

О Дујто Послание таро Петар

Поздрав

1 ¹ О Симон Петар, слуга хем апостоли е Исусе Христоскоро, цико окола, кола преку и правда амаре Девлескири хем Спасители о Исус Христос приминге исто скапоцено вера сар хем амен; ² о благодат хем о мир те умножинелпес ко пенџариба е Девле хем е Исусе, амаро Господари.

Ов денѓамен са сој аменге потребно

³ Соске Лескири Девликани сила денѓамен са сој аменге тано потребно баши живот хем побожност, преку пенџариба Околе, кој повикујнѓамен преку Пли сопствено слава хем шукарипа, ⁴ солеја аменге дендо скапоцена хем најбаре ветувања, та преку оленде те овен учесниќа е Девлеске ки природа, откога нашлен таро румимо живото, ковај тано ко свето, преку погрешна страстиа, кола владинена ко свето;

⁵ баши одова ден са тумендар хем исполнинен тумари вера шукарипаја, а о шукарипа е џандипаја, ⁶ а о џандипа со воздржливост, а о воздржливост со трпение; а о трпение со побожност; ⁷ а о побожност пхраликане мангипаја; а о пхраликано мангипа мангипаја. ⁸ Соске ако иситумен са адава хем адава умножинелапе, на ќерела тумен мрзлива хем неплодна ко пенџариба амаре Господаре е Исусе Христо. ⁹ Ама, кас нае одова, корољој тано хем кратко дикхела: соске бистерѓа дека тано очистимо таро пле пуране гревиа.

¹⁰ Одолеске пхрајљален, погрижинен тумен панда повише те зацврстинен тумаро позив хем избор. Уствари, ако ќерена одова никогаш нае те сопнинен тумен. ¹¹ Соске аѓар ка делпе туменге изобилно те кхувен ко вечно царство амаре Господареске хем Спасители о Исус Христос.

¹² Одолеске ка дикхав секогаш те потсетинав тумен баши акала буќа, иако џанена тумен, хем сијен утврдиме ко авдосутно чачипа. ¹³ Ама мислинава дека тано право цикоте сијум ко акава шатори ко мло тело, те џангавав тумен опоменибаја, ¹⁴ соске џанава дека скоро ка мукхав мло шатори, сар со известинѓама баши одова амаро Господари о Исус Христос, ¹⁵ а ка настојнав тумен, хем пало мло џајбе, те спомнинен секогаш баши акава.

Дикхлем Олескоро барипе

¹⁶ Соске кога објавингем туменге и сила хем о ајбе амаре Господарескоро о Исус Христос, амен на следингем лукава измислиме бајке, ама улем очевидциа баши Олескоро барипе, ¹⁷ соске Ов приминга таро Девел о Дат чест хем слава, кога тари величествено слава ало Леске о гласо: „Акавај тано Мло мангло Чхаво, ки Касте Ми милина тани.“ ¹⁸ Амен шунгем о гласо, кој ало таро небо, кога сијем сине Олеја ки свето гора.

¹⁹ Хем агар исиамен поцврсто пророчко слово, а тумен керена шукар со пазинена ки лесте, сар светило со светинела ко темно тхан, цикоте на правгола о диве хем и Деница засветинга ко тумаре срциа. ²⁰ Цанен акава англедер о са: ни јек пророштво ко Свето Писмо нашти те толкујнелпе кој сар мангела, ²¹ соске никогаш о пророштво на ало тари манушкани војља, него о света Девлескере мануша керена сине лафи водиме таро Свети Дух.

Ховавне пророка

2 ¹ А сине да хем ховавне пророка ко народо, сар со ка овел хем машкар туменде ховавне учитејља, кола тајно ка анен уништибаскере банге верувања хем ка одрекујнен е Господаре, Кој кингален, лена упри песте сигате уништиба, ² хем бут цене ка цан пало ленгоро румимо друмо, баши касте ка хулинепелпе о друмо таро чачипа. ³ Хем ко алчност ка искористинен тумен измислиме лафенцар, ама ленгоро осудување тано одамна готово хем ленгоро пропаст на дреминела.

⁴ Соске ако о Девел на поштединга е ангелен кола грешинге, него преденгален ко оковиа е мракоскере, фрдингален ко пекол за да те овен одотхе аракхле са цико судо; ⁵ хем ако на поштединга о пурано свето, него пазинга само е Ное, о проповеднико е правдакоро, панда евта душенцар, кога мукхља потоп упро о безбожничко свето; ⁶ ако осудингален ко пропаст о градиа о Содом хем о Гомор хем кергален ко право, хем постајнгален за пример баши о идна безбожника; ⁷ хем ако избавинга е праведнико о Лот, кас со мучинела сине о румимо живот е безакониконгоро, ⁸ соске акава праведнико, живибаја машкар оленде, мучинела сине таро диве ко диве пли праведно душа, дикхибаја хем шунибаја оленгере безаконска дејља – ⁹ одова значинела дека о Господари цанела сар те избавинел е побожна манушен таро искушение, а е

неправеднон те пазинелен баши казнибаске џико диве е судоскоро; ¹⁰ а особено окола, кола џана пало нечиста похоте е телоскере, хем на мангена о авторитети е Девлипаскоро. Сар дрска хем ки пли војља мануша ола на дарана те хулинен о величества, ¹¹ џикоте о ангејља, колај тане побаре ки сила хем снага, на изговоринена хулна осуда против оленде англо Господари.

¹² А акала, сар неразумна животниа, колај ки природа определиме те овен ловиме хем мударде, хулиненна ко окова со на џаненале, хем коркори ка мударѓовен ко пло разврат, ¹³ ка добинен казна баши неправда. Ола рачунинена о румимо живото дивескоро баши пло задоволство, мелале хем лаџаке тане ола, кола уживинена пле ховајбаја кога угостиненапе туменџар.

¹⁴ Оленгере јаќа пхерде со прељуба хем на џиденापес таро грево; ола ховавена о неутврдиме душе. Исилен срце сикавдо ко алчност; олај тане чхаве е проклетствоскере.

¹⁵ Мукхле о чачикано друмо хем нашавсалиле, хем геле пало друмо таро Валаама, о чхаво таро Восоров, кој мангља неправедно плата, ¹⁶ ама приминѓа укор баши пло безаконие: лалоро хер со ќерела лафи ко манишиќано гласо хем спречинѓа е пророкоскоро делинипа.

¹⁷ Одолај тане извојра бизо пани хем облаќа со ингарелален и бура; баши каске со пазинелапе темно мрако засекогаш. ¹⁸ Соске одолеја со ќерена ко баро хем ко чучо лафи, хем суетна лафиа ховавенален преку телесна страсна желбе хем преку пле румиме буќа околел, кола само со нашле таро окола кој живинена ки заблуда; ¹⁹ обечинена ленге слобода а коркори робиа баши румиме буќа, соске некој таро сој тано победимо, хем одолеске тано робо.

²⁰ Ако ола чаче џидингепес таро мелале навике таро аќава свето кога пенџарге баши амаро Господари хем Спасители о Исус Христос, хем акана палем плетќиненапе ки стапица таро румимо живото хем претрпинена пораз, тогаш оленѓири авдисутни состојба тани полошно тари окоја ко почеток. ²¹ Уствари, баши оленге ка овел сине пошуќар тена пенџарен сине о друмо е правдаќоро, отќолќу отќога пенџаргеле, те ираненпе тари свето заповед која оленге тани предајми. ²² Оленге случинелапе окова со ваќерела и вистинско поговорќа, ‘О џуќел иранелапе ко пло чхадиба,’ хем ‘О нанѓардо бало иранелапе те валќајнелпе ки чик.’

О Последна Диве

З¹ Мангљален, акавај тано веќе дујто послание, со пишинава туменге, хем ко солдуј џангававале, преку потсетиба, тумаро чисто разум,² за да те спомнинен туменге баши о лаџиа кова о света пророка ваќергелен англедер, хем баши и заповед е Господарескири хем Спасители, која предајнгела туменге тумаре апостојља.

³ Џанен англедер о са акава: дека ко последна диве ка јавиненпес мануша со ка кхеленпес е чачипаја, кола пе пле кхелибаја ка џан пало пле сопствена страстиа хем ка ваќерен:⁴ „Кај тано о ветување баши Лескоро ајбе? Соске откога муле о дада са терѓола аѓар, сар таро почеток таро создавање.“

⁵ Кога ки пли војља мангена аѓар, тогаш баши оленге ачхола гаравдо дека преку е Девлескоро слово и небеса сине одамна, хем дека и пхув таро пани хем преку о пани добинѓа о постоејне,⁶ преку одова хем о тогашно свето сине потопимо пајнеја хем аѓар пропадинѓа.⁷ А о авдосутне небесиа хем и пхув е исто словоја запазиме, хем аракхенапе баши јаг џико диве е судоскоро хем пропаст баши о безбожна мануша.

Е Господарескоро Диве

⁸ Ама јек на смејнела те овел туменге непознато, мангљален, дека баши о Господари јек диве тано сар илјада берш, хем илјада берш сар јек диве.⁹ О Господари на дуговлачинела одова со обечинѓа, сар со некој мислинена баши одова бавно, него сикавела Пло трпение ки туменде, соске на мангела некој те пропадинел, него сарине те авен џико покајание.

¹⁰ А е Господарескоро диве ка авел сар чор раќате; ко одова диве о небесиа ка накхен बारे бучаваја, хем са о буќа со иси ки пхув јагаја ка распадиненпе хем и пхув ка тхабљол са е делонцар сој ки лате.

¹¹ Соске са акава ка распадинелпес аѓар, саве требела те овен те водинен свето живото хем ко побожност, тумен¹² кола очекујнена хем сиѓаќерена о ајбе баши е Девлескоро диве, кога о тхарде небесиа ка распадиненпес хем са о буќа со иси ки пхув јагаја ка топиненпес?¹³ А амен, според Лескоро ветување, очекујнаја неве небесиа хем неви пхув ки која живинела и правда.

Последна лаџиа

¹⁴ Одолеске, мангљален, џикоте очекујнена акава, погрижинен тумен Ов те аракхел тумен чиста хем непорочна ко мир, ¹⁵ а о долготрпеливост амаре Господарескоро рачуниненле сар спасение, сар со хем амаро мангло пхрал о Павле пишинѓа туменге, според сој денди леске и мудрост; ¹⁶ сар со хем ко са пле лила ваќерела баши акава; ки ленде иси несаве пхаре те хаљонпе буќа, кола о неучиме хем неутврдиме иранена наопаку, хем о јавера Писмиа, баши пло уништиба.

¹⁷ Хем аѓар тумен, мангљален, кога џанена акава англедер, пазинен тумен и заблуда таро безакониќа тена повлечинел тумен ки песте хем тена преперен тари тумари цврсто положба, ¹⁸ него бајровен ки благодат хем ко пенџариба амаре Господаре хем Спасителе о Исус Христос. Олеске слава хем акана хем ко диве таро вечност. Амин!